

Ficà ant un lavativ;  
 Trant' e ses lire d' mana,  
 Mes rub d' epicoquana,  
 Loli l' è pa cativ.

## Il Cieco mendicante.

### CANZONE XLII.

**O** mi pover borgno!  
 Chi na vad virand  
 Tut quant 'l di a taston  
 Con me baston,  
 E ciamand da cà pr cà  
 La ca ca carità.

I na treuvo con gran stent,  
 Prchè a j' è d' certa gent  
 Ant coust mond,  
 Pr parlè ariond,  
 D' una gran tenacità  
 Pr fè d' ca ca carità.

A faran sauté ant un past  
 La borica con 'l bast,  
 E mi a l' us  
 A fè 'l tabus  
 I na sento apenna 'l fià,  
 Oh che ca ca carità!

Na daran pi prest ai can,  
 Ma 'l povr orbo ciama an van;  
 Esclamand  
 E sospirand,  
 Ch' a l' an dait una stiltà  
 A la ca ca carità.

Pr mantni coul' ambission  
 A spendran i dnè a baron;  
 E tratant  
 Un mendicant  
 A l' ha bel ciamè pietà,  
 J' è nen d' ca ca carità.

Ant un bal, ant un festin  
 A risparmiò pa 'l quattrin,  
 Ch' a l' an por  
 D' nen fesse onor;  
 Ma pr dene a un afamà  
 L' an pa d' ca ca carità.

Ai na j' è ch' a vendrio i dent  
 Pr podeje fè d' present  
 A quaich bel  
 Mostas d' amel;  
 Ma a sti si parleje pa  
 D' fè quaich ca ca carità.

Tanti e tanti sgairo i dnè  
 Pr dè a j' ostò, o pr giughè;  
 D' atri peui  
 A fè d' ambreui;  
 Ma l' an sempre i di argrignà  
 A fè d' ca ca carità.

D' vote un crich, una passion  
 Fa sauté un patrimonion;  
 Ma loli  
 L' è mai segui  
 Da che 'l mond l' è fabricà  
 Pr fè d' ca ca carità.

Ai na j' è pr piè lession  
 D' arme, o bal, o cant, o son  
 Ch' a spendran  
 A larga man;  
 Ma son peui pi interessà  
 Ant 'l fè la ca ca carità.

Fie e done maridà  
 Pr la pompa e vanità  
 Quanti dnè  
 Ch'a san sgairè!  
 Ma a stimrio una viltà  
 Fè un po' d'ca ca carità.  
 J'è chi s' pia dij piasi  
 Bin ch'a sio proibi,  
 Nè guardran  
 Lo ch'a spendran;  
 Ma l'an peui dificoltà  
 A fè d'ca ca carità.  
 Quanti dnè s' spendo ancor  
 Pr spuntè coul post d'onor,  
 Coul disegn  
 O coul impegn!  
 Na spendeisme la metà  
 Pr fè ca ca carità.  
 Mi povr om! i seu pa pi  
 Dont andè pr nen pati,  
 E tirè  
 Quaich doidnè;  
 A l'è morta, a l'è sotrà  
 La ca ca carità.  
 Quante speise ch'a s' fan mai  
 Ant i can, ant i cavai!  
 Motobin  
 Podrio bin  
 Lassè tanta spanparà,  
 E fè d'ca ca carità.  
 Quanta gent ch'a resto sbris  
 Pr ste alegher con d'amis!  
 A spendran  
 Tut lo ch'a l'an,  
 Ma daran pa un fi forà  
 A titol d'ca ca carità.

Couste teste da gridlin,  
 Pofarbaco e spadassin  
 A m' guardran  
 Pa pi ch' un can,  
 Quand i ciama pr la strà  
 La ca ca carità.  
 D' vote i stagh dij dontrè di  
 Con quaich mica d' pan mufi;  
 Maginè  
 Che bel stantè!  
 E pur j' eu bel tni sospirà,  
 J' è pi nen d' ca ca carità.  
 Veule un poch ch' i dia mi  
 Le personne ch' a dan pi?  
 Son la gent  
 Ch' a l' an dij stent,  
 E pi prest necessità,  
 Coui ch' a fan d' ca ca carità.  
 L' è peui lo ch' an tante cà  
 A j' ariva d' stravacà,  
 E san nen  
 Da doya a ven;  
 L' è ch' a son inimicà  
 Con la ca ca carità.

Una Monaca malcontenta.

### CANZONE XLIII.

**C**he sproposit, che folia  
 J' eu mai fait, mi povra fia!  
 Son propi staita spensierà  
 A lasseme dè la spinta  
 Pr doveje mnè si drinta  
 Una vita disperà!